

Gottes Gnad vnd Segen zu Zeitlicher vnd
Ewiger wolffahrt.

Strenger Edler Ehrnobhester
Achtbarer vnd Hochweiser Herr Bur-
germeister / Großgünstiger lieber Herr /
vnd mechtiger fürderer / Auch Erbare viel
Ehrentugentsame Frau / vnd Vielgün-
stige gute Freundin.

Es gibts leider die betrübte Erfahrung / wie die Edle
Medicina oder Arzney Kunst / zu diesen vnseren zeiten /
in so grewlichen mißbrauch vnd schedliche vorfalschung
gerhaten / das so viel vnbesonnene Kühne Leute / vnter
Männlichen vnd Frewlichen Geschlechte / sich dieser Kunst
vnterfahen / vnd / ohn einige wissenschaft oder Er-
fahrung / Auch zu den schwersten vnd gefährlich-
sten Kranckheiten / Rath zu geben / sich vnterziehen
dürffen / Daher denn vnzählich viel Menschen das
liebe Leben / welches sie sonst / durch Ordentliche
vnd gegründete Mittel der Arzney / wol erhalten vnd
vorlengern hetten können / Ziemerlich verlieren / vnd
also der Welt / in welcher sie noch viel gutes schaffen
mögen / alzubald entzogen werden. Ja es geschicht auch
offt vnter den gelerten / das die jenigen / so viel ein andere
Profession oder bestallung haben / gleichwol sich in die
Medicinam mengen / vñ jeder manne Rath geben wollen.
Fürnemblich aber vnd insonderheit ist zu beklagen / das
mit

mit